

# Kaji cadangan roboh

*Bangunan BB Plaza lokasi penting peniaga Melayu*

**SHAH ALAM** – Pertubuhan Pribumi Perkasa (Perkasa) menggesa kerajaan mengkaji semula cadangan merobohkan Bukit Bintang Plaza (BB Plaza) kepunyaan UDA Holding bagi memberi laluan kepada projek aliran transit massa (MRT).

Setiausaha Agungnya, Syed Hassan Syed Ali berkata, bangunan tersebut adalah satu-satunya pusat membeli belah terpenting dan memberi peluang kepada peniaga-peniaga Melayu di kawasan Bukit Bintang.

Dakwanya, pelan asal akan memabitkan deretan rumah kedai berhadapan dengan BB Plaza tetapi mendapat tentangan dari pemilik-pemilik dan peniaga terbabit maka pemaju MRT terpaksa mengambil bangunan BB Plaza.



**SYED HASSAN**

Menurutnya lagi, Perkasa juga pelik kenapa MRT diperlukan lagi di kawasan Bukit Bintang sedangkan kemudahan awam dan rangkaian jalan raya yang amat mudah ke tempat ini.

“Rangkaian bas yang banyak, teksi dan sudah ada monorel dari pinggir bandar raya terus ke Bukit Bintang. Begitu

juga dengan Star LRT sudah ada stesenya di Jalan Hang Tuah hanya beberapa minit sahaja berjalan untuk ke Bukit Bintang.

“Jadi mengapa perlu ada stesen MRT di tengah-tengah kawasan Bukit Bintang?” katanya dalam satu kenyataan semalam.

Katanya lagi, kerajaan harus memilih kawasan berhampiran dengan Bukit Bintang yang masih belum men-

jadi tumpuan pelancong seperti kawasan tapak Penjara Pudu.

“Jika ini boleh dilakukan pasti juga tapak Penjara Pudu bila dibangunkan di atas permukaan tanahnya akan menjadikan kawasan itu lebih bernilai dan UDA yang juga pemilik tapak Penjara Pudu boleh membangunkan tapak tersebut dengan lebih pesat dan lebih menguntungkan,” katanya.

Sebelum ini, Pengerusi UDA Holding, Datuk Nur Jazlan Mohamed dalam satu kenyataan berharap berharap pampasan akan diberikan oleh MRT Corp Bhd sebagai ganti rugi jika bangunannya, BB Plaza perlu dirobohkan.

Perancangan pelupusan bangunan itu, yang turut melibatkan sebahagian bangunan Yayasan Selangor, bakal dilaksanakan bagi memberi laluan kepada pembinaan projek mega kerajaan, Transit Pantas Massa (MRT), untuk kerja-kerja pembinaan stesen bawah tanah.